

Date – 21/03/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Vawiin Down Syndrome Day, 2026-ah anmahni duhsak tute leh hmangaitute chuan an tan duhsakna chibai an buk.
2. Kum 2022 leh 2026 inkarah internet kaihnawih suauna, cyber crime thubuai 361 ziahluh a ni tawh a, kuminah cyber crime thubuai 5 ziahluh tawh a ni.
3. Vawiin khan rampumah Muslim te sakhaw ni pawimawh Eid-ul-Fitr hman a ni.
4. US President Donald Trump-a chuan sipai hmanga Iran an beih mek ti nep hret tur angin thuchhuah a siam.

<><><>

DOWN SYNDROME DAY

Vawiin hi khawvel pumah down syndrome te ni bik Down Syndrome Day, 2026 a ni a, vawiin khan an mahni duhsak tute leh hmangaitute chuan he ni hian an tan duhsakna chibai an buk a ni.

Mizoram Chief Minister Pu Lalduhoma pawhin Down Syndrome Day pual hian social media kaltlangin Down Syndrome te leh hmangaih taka anmahni enkawltute zawng zawng chibai a buk a. An tana theihtawp chhuah reng thin Mizoram Down Syndrome Association chungah lawmthu a sawi a. Down Syndrome te hian kaihruaitu leh zirtirtu tha an neih phawt chuan engkim an ti ve thei vek a, duat takin i enkawl zel ang u, a ti a ni.

Social Welfare Minister Pi Lalrinpuii pawhin World Down Syndrome Day pualin Mizorama Down Syndrome te chibai a buk a, hun hlimawm tak hmang turin duhsakna a hlan.

Synod Moderator Rev. John Raldosanga chuan Mizote chuan mahni chhungkua leh chhehvelah down syndrome awmte chu hmusit leh endawng mai lovin, an mahni ngaihsaka, anmahniah Pathian ropuina puanchhuahna atan hman theih a ni tih hriaa, down syndrome zawng zawngte dinhmun ngaihtuah chungin kohran te pawhin rawngbawlina amahni lama huang zauh zel a pawimawh a ti a. An tih theih loh ringawt hriat sak lova an theihna pawh hriat saka chanvo pek te pawh a ngai tih a sawi a ni.



HAIL STORM DAMAGE

Nimin tlai rial tla in Mamit Luangpawl vengah In 64 a deng chhia in Chenna In 5 te chu luah zui tlak loh khawpin rial hian inchhung rangva a deng chhia a ni.

Mamit Luangpawl veng khawtlang hruaitute hnen atanga thudawn danin nimin tlai rial tla nasa chuan Mamit Luangpawl veng a chenna In 62 leh School leh Kohhran In 2 avaiin 64 chu a deng chhia a, heng zinga chhungkaw 5 te chhenna In te chu luahzui zel tlak loh khawpin a deng chhia a, tin chenna In 30 te chu inthiar chhuah ngailo mahse rial hian a deng chhe nasa hle a, tin a dang 29 te chu rangva tlak ngai ni hlawm mahse a chhe nasa lutuk lo deuh.

Nimin tlai a Mamit Luangpawl vengah rial tla hi a tam bakah a lian hlawm hle a, rial tla hi artui tiat a lian te a ni hlawm a ni.

Mamit Luangpawl khawtlang hruaitute chuan rial tla avanga chhiatna an tawh chungchang hi Mamit DM&R lamah an thlen tawh a, DM&R lam atangin inchhung chhe nasa zual te chu inchhung khuhna tur silpaulin an pe chhuak hlawm a ni.



TUISUMPUI BAILEY BRIDGE INAUGURATED

Vawiin khan Tuisumpui lui a Bailey Bridge (TDR) 170 ft a sei chu tangkai tak leh hlawk taka hman turin Chief Engineer (Road) Pu David Sapzova'n a hawng.

He kawng hi Siaha District khawpui Siaha leh Tipi Ferry, PMGSY Road pawimawh tak Saiha-Rawmibawk Road a awm a ni. Riasika, Amotlah leh Thiahra khua te thlunzawmtu leh District dangte nen a in kal pawhna pawimawh tak a ni bawk a ni. Tuisumpui lui a Bridge awm loh avang hian furpui chhung zawngin tui lian avangin mihring leh lirthei hmangin Tipi Ferry, Riasika, Amotlah leh Thiahra khua te hi tlawh pawh hleih theih lovin an awm thin a. Chuvangin, Tuisumpui lui ah hian Tipi Ferry khawtlang leh a chhehvel khua ten harsa tak chungin Seasonal bridge (timber bridge) kum tin an dawh thin a. Hetiang Seasonal bridge hian lirthei load sang a dawl zawh tawk loh bakah a him tawk lovin a rintlak tak tak lo a ni.

Tichuan heng harsatna hrang hrang te sukian turin kum 2023 atang khan Tuisumpui lui a Bridge dawh hi hmalak tan a ni a. FY2023-24 ah Bridge Abutment (Sub-structure) siam nan SASCI atangin cheng nuai 150 hmuh a ni a. He hna thawk tur hian contractor atan Pu Lalparmawia, Hlimen, Aizawl thlan a ni. Tichuan, Bridge Abutment hi ni 20.10.2023 ah hnathawh tan niin, ni 31.03.2025 khan thawh zawh a ni a. SASCI 2023-24 atang hian Bridge Abutment chauh siam a ni a. PWD hotu te hmalak na zarah bridge super structure, Bailey Bridge (TDR) siam nan FY 2024-25 5054 ah (Roads & Bridges) hnuaiah Mizoram Sorkar (State Sorkar) atangin cheng nuai 250 sanction hmuh a ni.

He Bailey Bridge (TDR) siam tur hian Supplier leh Erection leh Launching titel turin Essen Fabricators Pvt. Ltd., Kharagpur, West Bengal thlan a ni a. Nikum

October Ni 1 ah hna thawh tan niin ni thla hmasa ni 23 khan lei dawh hna hi thawh zawh a ni.

Vawiin a Tuisumpui Lei dawh a nih tak avang hian heng khaw pali, Tipi Ferry, Riasikah, Amotla leh Thiahra te bakah Siaha District mipui tan pawh awlsam zawka zin veivah theih a ni dawn a ni.



CYBER CRIME TRAINING

Kum 2022 leh 2026 inkarah internet kaihhnawih sualna, cyber crime thubuai 361 ziahluh a ni tawh a, kuminah cyber crime thubuai 5 ziahluh tawh a ni.

Mizoram State Legal Services Authority (MSLSA) leh Mizoram Police in nimina an buatsaih Cyber Crime traininga hun hmanpuitu zinga mi Justice Nelson Sailo chuan he thu hi a sawi a. Kum 2017 khan India danpui Article 21-na hnuai Fundamental Right-ah 'Right to Privacy' chu a pawm thu sawiin hemi zui zel hian Parliament chuan Digital Personal Data Protection chu kum 2023-ah India khua leh tui te data dikna chanvo atan a pawm leh thu a sawi a. Internet lama sualna a pun zel thu sawiin India ramah kum 2023-ah cyber crime thubuai 86,000 ziahluh a nih thu a sawi a. Heta a tam ber chu sum kaihhnawiha inbumna, social media hmansual leh mipat hmeichhiatna kaihhnawih sualna a nih thu a sawi a. Mipuite chu antivirus software hmang uar tur te, file hriat loh internet-ah va hmet leh download mai mai lo tur tein a chah a, harsatna nei te chu rang taka police hna report thin turin a chah bawh a ni.

He hun hmanpuitu Justice Michael Zothankhuma pawhin thu sawiin cyber crime chu amah pawhin a tawn tawh thil a nih thu sawiin hemi chungchanga training mumal tak buatsaih a ni chu lawmawm a tih thu a sawi a. Thiamna sang zelah khawvel pumah helama harsatna tawh an tam zel thu a sawi a. Tunlai thiamna sang milin dan lam pawh a inher ve zel a ngaih thu sawiin sualna pung zel do turin tanrual a ngaih thu a sawi a ni.

DGP Pu Sharad Agarwal pawhin thu sawiin cyber crime hmanrua atan tunlaia khawl changkang, Artificial Intelligence an hman chhoh zel thu a sawi a. Mizoram Police chuan Technical Support Cell te siamin digital forensic tool hrang hrang a hman tangkai zel thu a sawi a ni.



CHAMPHAI DIVISIONAL FOREST OFFICER

Champhai Divisional Forest Officer (DFO) Pu Lalbiakchama Chawngthu chuan tunhnaia Zawlsei khuaa chinghnia paruk kah hlum anga social media-a thang chu chhui a nih thu a sawi.

Tunhnaiah East Tuipui biala Zawlsei khuain kumin, 2026 atana an thlawhhma tur an hal Ni, March ni 5 ni khan Chinghnia 8 chu lo neitu ten lo halna, vahchap kang atanga tlanchhia te chu chang chhuakin silai hmangin an lo kap a, chinghnia an lo kahte zinga 6 te chuan Silai mu tawng fuhin an thi niin Social Media ah puanzar a ni a.

He thil hi nungcha humhalh lai, Dan lova tihlumna thil a nih avang leh Dan bawhchhiatna thil a thleng nia a lan avangin Champhai DFO Pu Lalbiakchama

Chawngthu chuan thil awmdan a hriat veleh bawhzui nghalin thil diklo titute man chhuak a, hrem an nih theihna turin hma a la nghal tih a sawi a. Champhai DFO Pu Lalbiakchama chuan he thil enfiah tur leh a tul anga hma la zui turin Khawbung Forest Range Officer chu Zawlsei khuaah a tir nghal a. Zawlsei khuaa khawtlang hruaitute thil kalphung a zawtfiah a. Zawlsei khuaah Bawng emaw, Sial emaw, a huhova vulhtu an awm loh thu leh an thlawhmma hal avanga Chinghnia kahhlum a nih thu an hriat ve loh thu Zawlsei khawtlang hruaitute chuan an lo hrilh a. March ni 15, 2026 khan Champhai DFO chuan Zawlsei khuaa hi tlawhin thil awmdan a hmunah kalchilhin a enfiah tawh a, vawiin thlengin Chinghnia te kahhlum an nih leh nih loh hriatfiah a la ni rih lo a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

WORLD FORESTRY DAY

Vawiin khan Thenzawl DFO Dr R Lalnungrenga hovin JNV Thenzawlah World Forestry Day pualin hun hman a ni.

International Day of Forests (World Forestry Day) hi kum tin March ni 21-ah hman thin a ni a. Kumin pawh hian Thenzawl Forest Division hnuai ah he ni hi JNV Thenzawl ah hman niin, Thenzawl Forest Division staff leh JNV school naupangte leh faculty ten he hun hi an hmang a. Thenzawl DFO Dr R. Lalnungrenga chuan thu sawiin chhehvela Pathian thilsiamte nena inrem taka awm ho dan zir a tul thu te, tui thianghlim in tur Mizoramin a neih reng theih nan ramngaw te venhim a tul hle tih a sawi a. Mizoram chu mihringte chauh chenna tura Pathian siam a ni lo tih sawiin inngeih tlang taka thilsiam dangte nena chengho tura mihring te chu siam an nih thu a sawi a ni.

Thenzawl RO Pu Zirtluanga Hnamte pawhin thu sawiin kumin World Forestry Day thupui “Forests and Economics” a nih ang takin Mizorama ramngaw chu state ei leh bar dinhmun tithangtu atana hmang turin mipuite a sawm a ni.

<><><>

MIFCO

MIFCO Chairman Pu Lalthazuala Rawite chuan kumin hian Sapthei tui leh Lakhuihthei tui sawr bakah Serthlum tui sawr tum a nih thu leh Baibing leh Rawtuai tin hralhchhuah tur khawp siam an tum bawk tih a sawi.

MIFCO Board of Directors meeting vawi 100-na nimin-a thutkhawm-ah MIFCO Chairman Pu Lalthazuala Rawite chuan kuminah Sapthei Kg-ah Cheng 45 leh Lakhuihthei Kg-ah Cheng 18-in an lei dawn tih a sawi a, tun atanga hun rei

loteah Sapthei leh lakhuihthei tui an siam chu dawra zawrhchhuah tura siam mek a nih thu a sawi.

MIFCO Board of Directors thutkhawmna hian Statutory Audit Report an thlir hova, Statutory report-a a lan danin, Sorkar kum kal mek kum 2025-26 chhungin MIFCO hian hlep cheng nuai 14 a nei a ni.



EID

Vawiin khan rampumah Muslim te sakhaw ni pawimawh Eid-ul-Fitr hman a ni. Hmun hrang hrang Eid puala intawhkhawm leh tawngtaina hun hman a ni ang. Vawiin hi thla thianghlim Ramadan kharna tur niin hlim leh lawm takin Eid hmanga khar a ni ang.

President Drouapadi Murmu-i chuan ramchhung khua leh tuite Eid-ul-Fitre duhsakna chibai a buk a. President Murmu chuan Eid chuan mahni inthununna, midang tana malsawmna leh mi retheite lainatna kut a ni a ti a. Eid ah hian mitin malsawmna an dawn theihna tur chu a pawimawh atih thu sawiin tanpui ngaite tanpui tur leh inpumkhatna leh inunauna atana theithawp chhuah zel turin mitin a sawm a ni.



EID UL-FITR

Aizawl Mosque Committee & Muslim Welfare Society buatsaihin Aizawl West Joint YMA field ah tukin khan Eid ul-Fitr hun hmangin tawngtai rualna neih a ni a.

Aizawl Mosque committee & Muslim Welfare Society General Secretary Mamon Majumdar chuan he ni puala hun tha tak an nei thei chu lawmawm a tih thu sawiin, Mizoram mipui ten duhsak taka Muslim mite an lo dawnsawn leh an puihna thin ah lawmthu a sawi a. Mamon Majumdar chuan Mizoram sawrkarin dan zawm tur a siam chungchangah Muslim mipuite chu thu awih taka an tih tur ti a, ram neitu mipuite nen tha taka an inkaihruaina te zawma awm thin turin a chah a, tukkina Eid Ul- fitr puala tawngtaina nei a kalkhawm te chu an sakhaw ni pawimawh alo thlen hian mi tanpui nate, mi ngaihdamna leh khawngaihna te bakah hmangaihna midang chungah lantir thin turin a chah bawk a ni. Aizawl Mosque Committee hi kum 1909 ah din niin tunah hian Sairang, Pushpak leh Kolasib ah te Mosque din a ni tawh a ni.



US

US President Donald Trump-a chuan sipai hmanga Iran an beih mek ti nep hret tur anging thuchhuah a siam. Truth Social ah he thu hi tarlangin President Trump-a chuan US chuan tuna Iran laka a thiltum ber a tihhlawhtlin tep tak avangin sipai hmanga beihpui a thlak chu tihnep deuh a tum hnai niin a sawi a. Hei hi February ni 28-a Iran an beih hnua inepna boruak tih ziawmna rawngkai thu a sawi vawikhatna a ni a. Tunkar chhohah Iran chuan na zawkin Israel leh US te a beih

chhonzawm hnu lawkah hetiang thuchhuah hi Pu Trumpha hian a siam a. Iran-a gas field pawimawh tak takte tun kar chhung khan Israel hian a bei a. Iran lam hian chhangletin Qatar-a awm khawvela LNG plant lian ber a kap ve nghal a. Hei hian khawvel puma gas leh oil man a nghawng nasat dawn avangin Donald Trump-a hian boruak ti dai zawnga chet lam a hawi ta nia hriat a ni a. Israel hian Iran gas field te hi a bei chhonzawm tawh dawn lo niin Pu Trumpha chuan a sawi bawka ni.

<><><>